

Suliffeqarnermi innersuussisarneq il.il. pillugit Inatsisartut peqqussutaat nr. 10, 18. december 2003-imeersoq Atoussimasooq (Historisk)

Suliffissarsiuussisarnermut inunnillu isumaginninnermut Kalaallit Nunaanni inatsimmi nr. 580-imi, ulloq 29. november 1978-imeersumi § 2-p kingunerisaanik, tak. Suliassaqarfiit Kalaallit-nunaanni hjemmestyreqarnermut nuunneqarnissaannik inatsisit ilaasa atortuulersinneqarnerannik Kalaallit-nunaannut ministeqarfiup nalunaarutaa nr. 417, 27. september 1979-imeersoq, aalajangersarneqarput:

Nassuiaatit atuuffiilu

§ 1. Suliffeqarnermi innersuussisarneq paasineqassaaq suliffeqarnermi ineriartorneq siuarsarniarlugu nuna tamakkerlugu, illuinnaasiunngitsumik akeqanngitsumillu sullissinertut, taamatuttaaq sulisartut suliamut tunngatillugu nukittorsarneqarnissaat nunamilu nuttarsinnaanerit ilanngullugit.

Imm. 2. Suliffissamik innersuussisarneq paasineqassaaq suliffissarsiortup sulisitsisullu akornanni suliffeqarnermi pissutsit aalajangersimasut pilersinneqarnissaat siunertarlugu attaveqatigiissitsinertut.

Imm. 3. Suliffeqarnermi innersuussisarfiup suliassaraa inuussutissarsiutinit atorfinnillu assigiinngitsunit tamanit suliffissarsiortunut suliffissanik innersuussisarneq aamma sulisitsisinut sulisussanik innersuussisarneq. Taamatuttaaq suliffeqarnermi innersuussisarfiup ilinniagaqarnermut tunngasuni qinnuteqartunik siunnersuineq allaffissornikkullu aqutsineq suliassarai.

Imm. 4. Peqqussut sulinermit Kalaallit Nunaanni sularineqartumut atuuppoq, tassunga ilanngullugit suliffissarsiortut Kalaallit Nunaanni suliffissarsiortut killilersimaarneqarnissaat pillugu Inatsisartut inatsisaat naapertorlugu nunatsinni sulisartutut isigineqartut.

Kommunalbestyrelsip suliassai

§ 2. Kommunalbestyrelsip suleqataalluni suliffeqarnermut tunngasutigut ingerlatsinerminnut ilanngullugu

- 1) Kommunimi suliffeqarnermi ineriartorneq malinnaavigissavaa,
- 2) Kommunimi iliuusissanik inuussutissarsiortunerup ineriartortinneqarneranut suliffissaqartitsinermullu pingaarutilinnik aallartitsisarnissamut tunngavissat pilersissavai suliniutigisassallugillu, kiisalu
- 3) Kommunimi suliffeqarneq pillugu paasissutissat katersussavai nalilersorlugillu, paasissutissallu tamakku Naalackersuisunut nalunaarutigisassallugit.

Imm. 2. Imm. 1, nr. 3 naapertorlugu Naalackersuisut nalunaarutiginnittarneq pillugu erseqqinnerusunik malittarisassanik aalajangersaasinnaapput.

§ 3. Kommunalbestyrelsi pisussaavoq kommunimi suliffeqarnermi innersuussisarfissaqartitsissalluni, taamatuttaaq suliffissanik innersuussisarnermik aamma ilinniartitaanernut inuussutissarsiutinullu

ilitsersuisarnernik aqqissuussissalluni, §§ 5 B 9 takukkit.

Imm. 2. Kommunalbestyrelsip kommunimi suliffissaqartitsineq pillugu kisitsisitigut paasissutissat Naalackersuisunut nalunaarutigisassavai.

Imm. 3. Naalackersuisut kommunalbestyrelsip kisitsisitigut paasissutissanik il.il. nalunaaruteqartarnera pillugu malittarisassanik aalajangersaasinnaapput.

§ 4. Kommunalbestyrelsip sulissutigissavaa kommunimi suliffeqarnermi illuatungeriit pisortallu ingerlatsiviisa akornanni tatigeqatigiiffiusumik qanittumillu suleqatigiinnermik pilersitsisoqarnissaa, taamaalilluni sulisartut ineriartortinneqarnerannut suliniuteqarnissamut tunngavissaqalissammat, siunissami qaninnermi ungasinnerusumilu inuussutissarsiortut pisariaqartitaannut kommunimilu inuussutissarsiutit ineriartortinneqarnerannut periarfissanut tulluussakkanik.

Imm. 2. Kommunalbestyrelsi kommunimi sulisartut piginnaasaasa nukittorsarneqarnissaannut suliffissaqartitsinermut tunngatillugu iliuusissanik aallartitsinissamut siunnersuusiussaaq.

Imm. 3. Kommunalbestyrelsi suliffissaqartitsinermut tunngatillugu aamma/ imaluunniit ilinniartitaanermut tunngatillugu immikkut neqeroorutinik inuusuttunut 25-t ataallugit ukiulinnut sammisitanik aallartitsissaaq.

Imm. 4. Naalackersuisut suliffissaqartitsinermut tunngatillugu iliuusissat pillugit maleruagassannik aalajangersaasinnaapput.

Inuussutissarsiutinut ilinniartitaanernullu ilitsersuisarneq kiisalu suliffissanik innersuussisarneq

§ 5. Kommunalbestyrelsi suliffissarsiortunut inunnullu piginnaangorsaanerup ingerlaneranut imaluunniit inuusuttut kiffartuussinerannut peqataasunut ataasiakkaanut iliuusissanut pilersaarusiussaaq.

Imm. 2. Inuussutissarsiutinut ilinniartitaanernullu ilitsersuinermut ilaapput inuussutissarsiummik ilinniartitaanermillu toqqaaniarnermi ikiorsiinerit.

Imm. 3. Kommunalbestyrelsi Inatsisartut peqqussutaat manna malillugu kommunalbestyrelsip suliassaasa allaffissornikkut aqunneqarnerannut ilitsersuisarfimmik suliffeqalernissamullu piareersarfimmik pilersitsisinnaavoq.

Imm. 4. Kommunalbestyrelsi inuussutissarsiutinut ilinniartitaanernullu ilitsersuinerup kiisalu suliffissanut innersuussisarnerup inernera pillugu Naalackersuisunut nalunaaruteqarnissamut pisissaaffeqarpoq.

Imm. 5. Naalackersuisut pissutsit imm. 2-4-mi taaneqartut piviusunnigortinneqarnissaannut malittarisassanik aalajangersaasinnaapput, taamatuttaaq qitiusumik ilitsersuisarfiit suliffeqalernissamullu piareersarfiit pilersinneqarnerannut ingerlanneqarnerannullu tapiissuteqartarneq pillugu malittarisassaliorinnaallutik.

§ 6. Suliffissamik innersuussisoqartinnagu akissarsiat aamma sulinermi atorfinitsitaanermilu atugassarititaasut allat pillugit paasissutissat pissarsiarineqassapput.

§ 7. Suliffissamik innersuussineq najukkamiit allamut nuunnermik kingunilik pissappat piunasaqaataavoq,

1) nuunneq suliffeqarnermi najukkami suliamullu tunngatillugu pisariaqartitanik naliliineq

aallaavigalugu kissaatigineqartut isigineqassasoq,

2) suliffissarsiortoq akuersisimassasoq,

3) innersuunneqartoq angallanneqarnermut pisattanillu nuussinermut aningaasartuutissinneqassanngitsaq, aamma

4) innersuunneqartoq inissaqartinneqassasoq.

Imm. 2. Naalackersuisut aningaasartuutit imm. 1, nr. 3-mi taaneqartut matussutissaannut tapiissuteqarsinnaapput. Naalackersuisut tamakku pillugit malittarisassanik erseqqinnerusunik aalajangersaasinnaapput.

§ 8. Sulisussanik sulisitsisumut imaluunniit suliffeqarfimmut innersuussisoqarsinnaanngilaq sulisartut kattuffiannit soqutigisaqaqatigiiffimilluunniit allamit uppersaait sukumiisut malillugit sulisartut suliumajunnaarneranni imaluunniit sulisitsisut mattussineranni eqqugaasumut, tamanna isumaqatigiissutinut akerliusutut nalilerneqarsimangippat.

§ 9. Atorfimmut inuttaqanngitsumut sulisussamik naleqquttumik innersuussisoqarsinnaagaangat tamanna pillugu kommunalbestyrelsi sulisitsisumut nalunaaruteqartassaaq.

Imm. 2. Sulilernissaagaluq piviusunngunngitsoorpat sulilernerluunniit aallartikkaluaannaq taamaatinneqarpat sulisitsisoq pisussaavoq tamanna pillugu kommunalbestyrelsimut piaartumik nalunaaruteqassalluni taamatullu tamatumunnga pissutaasoq nalunaarutigissallugu.

Imm. 3. Sulisitsisoq sulisussanik innersuunneqartunik itigartitsisoq angallanneqarnermut pisattallu nuunnerinut aningaasartuutigineqarsimasunik utertitsilluni akiliisussaataavoq, sulisussanik allanik sulilersitsineq itigartitsineranut pissutaasimappat sulisitsisorlu kommunalbestyrelsimut piffissaagallartillugu suliffigiligassamut angalanerup pinngitsoortinneqarsinnaasimagaluarneranik ilisimatitsissuteqarsimangippat.

Aalajangersakkat assigiinngitsut

§ 10. Naalackersuisut nuna tamakkerlugu suliffissanik nalunaarsuivimmik pilersitsisinnaapput, suliffissanik neqeroorutit, suliffissaaleqinermik allaffissornikkut aqutsinerup aammalu kisitsisitigut paasisutissiornissat nalilersuillunilu misissueqqissaarnissat siunertaralugit tunngaviummik paasisutissat katersorneqarfigisinnaasaannik suliareqqinneqarfigisinnaasaannillu.

Imm. 2. Naalackersuisut imm. 1 malillugu suliffissanik nalunaarsuiffiup pilersinneqarnissaa pillugu malittarisassanik aalajangersaasinnaapput, taamatuttaaq suliffissanik nalunaarsuiffiup atornissanut kommunalbestyrelsip pisussaaffii pillugit malittarisassaliorsinnaallutik.

§ 11. Naalackersuisut kommunini sulisunik suliffeqarnermi innersuussisarnermik il.il. suliaqartunik ukiumoortumik pikkorissartitsisassapput.

Imm. 2. Naalackersuisut kommunalbestyrelsinut qinersisoqareernerani tamatigut kommunalbestyrelsimut ilaasortanut peqqussummi matumani pineqartunik suliassaqtitaasunut pikkorissartitsisassapput.

Imm. 3. Imm. 1 aamma 2 naapertorlugit pikkorissartitsineranut aningaasartuutit Nunatta Karsianit kommuninillu akilerneqartassapput.

§ 12. Naalackersuisut suliassaqtitsinermik siuarsaaniarluni iliuitsinut aamma inuusuttut

kiffartuussinerinut tapiissuteqarsinnaapput, takukkit § 4-imi imm. 2 aamma 3. Tapiissutit annertussusissaat ukiumoortumik aningaasanut inatsisini aalajangersarneqartassapput.

Imm. 2. Naalakkersuisut tapiissutit agguanneqartarnerinut akiliutigineqartarnerinullu maleruagassanik aalajangersaasinnaapput.

§ 13. Naalakkersuisut suliffissaaleqinerup akiorneqarnissaa kiisalu suliffeqarnermi innersuussisarnerup pisariillisaavigineqarnissaa ineriartortinneqarnissaalu siunertaralugit misileraanerit pillugit malittarisassanik aalajangersaasinnaapput.

§ 14. Naalakkersuisut ukiumi qaangiuttumi suliffeqarnermi suliniutaasut aamma piffissami aggersumi anguniagaasut taamatuttaaq malitseqartitsinissat aallartinneqassanersut pillugit ukiumoortumik nalunaarusiortassapput.

Naammagittaalliuuteqartarnej

§ 15. Kommunalbestyrelsip aalajangiinerinik naammagittaalliuutit sapaatit akunneri sisamat qaangiutsinnagit Naalakkersuisunut suliassanngortinneqarsinnaapput.

Atuutilerfia

§ 16. Inatsisartut peqqussutaat manna ulloq 1. januar 2004-mi atuutilissaaq. Tamatumunnga peqatigitillugu Suliffissarsiuussisarnej pillugu Inatsisartut peqqussutaat nr. 11, 16. december 1988-imeersoq atorunnaarsinneqassaaq.

Imm. 2. Kalaallit Nunaanni ilinniarnermut inuutissarsiutinillu ilitsersuineq pillugu Namminersornerullutik Oqartussat nalunaarutaat nr. 5 3. september 1982-imeersoq ingerlaannassaaq Inatsisartut peqqussutaata matuma malitsigisaanik allanngortinneqarnissami atuukkunnaarsinneqarnissamiluunniit tungaanut.

Imm. 3. Malittarisassat suliffissarsiuussisarnej pillugu Inatsisartut peqqussutaat nr. 11, 16. december 1988-imeersup malitsigisaanik aalajangersarneqartut ingerlaannassapput, Inatsisartut peqqussutaata matuma malitsigisaanik allanngortinneqarnissanik atuukkunnaarsinneqarnissamilluunniit tungaanut.

Namminersornerullutik Oqartussat, ulloq 18. december 2003

Hans Enoksen

/

Johan Lund Olsen